

do Łužicy a pomjenowachu swoje tu nowozaložene sydlišća w hórskich stronach po svojim nawjedowarju a rozkazo-warju (locator, rychtař, šořta), z wukóncom -dorf, jich serbscy susodža pak sebi tute němske mjena po móžnosći zeserbšćichu a dachu jim zwjetša wukónce rodžinstwow -ecy, -icy (sta. -ovici, -ici), porědko wukónce wobsydstwow -ow, -in, na př. Bejerocy (Beyersdorf), Džětmarecy (Dittmannsdorf), Herbikecy (Herwigsdorf), Hartmanojce (Hartmannsdorf). — Druhdy pak tež Němcy stare serbske sydlišća překřćichu dawši jim mjeno po ryčerju, kiž wjes wot krala za wobsydne leno dosta, kaž na př. Wukrančicy (Weigersdorf), Wuhančicy (Weigsdorf); Germarojce (Germersdorf).

III. Při wułożowanju sym ja pola kóždeho mjena woznamjenił, do kotreje tych 3 družinow wono sluša, a to w přenjem džěle w spinkach na kóncu z řacanskim ličbnikom I abo II abo III a w druhem džěle za dwójdypkom w němskem přeložku serbskeho městneho mjena z krótsenkami: Ss. (= Sippensiedlung) abo Rs. (= Rittersitz) abo As. (= Abbausiedlung).

W kóždem přenjem wotdžělenju zady kóždeho serbskeho mjena stoji w tych spinkach najprjedy staroserbska twórba, potom pola rodžinskich a wobsydných mjenow wosobinske a to zwjetša skrótšene mjeno, wot kotrehož to wjesne mjeno pokhadža, a na třecem městnje polne wosobinske mjeno, ke kotremuž to skrótšene mjeno sluša, a hdyž so mi nuzno zdaše, sym němski přeložk přidał; a na kóncu stoji romska ličba pak I pak II pak III, kotraž pokazuje, do kotreje tych třoch skupinow mjeno sluša. K romskim ličbam pak su často pismiki a abo b abo c přistajene, kotrež maju poddžěle tych skupinow woznamjenjeć.

To njech wujasnja tónle krótki načisk:

I. Rodžinstwa = Sippensiedlungen: Ss.

- I = stare mjena serbskich rodžinstwow, I 1 po wosobinskich mjenach, I 2 po přimjenach;
- Ia = rodžinske mjena po nowišich (křesćijanskich, t. j. křćeńskich) mjenach načolnikow;
- Ib = rodžinske mjena po němskich wobsydnikach-knježkach (na př. Bjernadžicy, Biskopicy) abo po založerjach (locatores) němskich kolonijow (na př. Habrachčicy);
- Ic = mjena wudworow po rodžinskich mjenach tworjene (na př. Khrósčicy).